



GRUPA POSLANIKA/ZASTUPNIKA PARLAMENTARNE SKUPŠTINE BOSNE I
HERCEGOVINE, PARLAMENTA FEDERACIJE BOSNE I HERCEGOVINE,
NARODNE SKUPŠTINE REPUBLIKE SRPSKE I LOKALNIH SKUPŠTINA/VIJEĆA

Poštovane kolege,

kao što vam je poznato, Bosna i Hercegovina se susreće sa brojnim izazovima uzrokovanim nestabilnom političkom situacijom u zemlji, ali i neodgovornim političkim elitama dominantno okrenutim ispunjavanju ličnih interesa. Ipak, razlog ovog obraćanja vama i molbe da se uključite u rješavanje jednog od potencijalno najvećih regionalnih problema nije niti jedan od unutrašnjih problema Bosne i Hercegovine. Obraćam vam se zbog namjere Republike Hrvatske, članice Evropske unije, da radioaktivni i nuklearni otpad odlaze i skladišti na samoj granici sa Bosnom i Hercegovinom, na lokaciji Trgovska gora u općini Dvor.

Protivljenje ovoj neshvatljivoj odluci susjedne države u Bosni i Hercegovini je ujedinilo sve političke snage što je prava rijetkost u našoj državi. Parlament Bosne i Hercegovine, ali i oba entitetska parlamenta, kao i predstavnička tijela lokalnih zajednica, usvojili su suštinski iste stavove protivljenja ovoj namjeri institucija Republike Hrvatske. Predsjedništvo Bosne i Hercegovine na sjednici održanoj 22. marta 2019. godine usvojilo je zaključke kojima se, između ostalog, traži od Republike Hrvatske da lokaciju Trgovska gora, koja se nalazi u neposrednoj blizini granice sa Bosnom i Hercegovinom, izuzme kao mjesto predviđeno za odlaganje i skladištenje radioaktivnog i nuklearnog otpada. Naglašavam da se ovoj namjeri institucija Republike Hrvatske jako protivi i lokalna zajednica sa hrvatske strane granice, koja nam je dala snažnu podršku u aktivnostima na sprječavanju ovog nerazumljivog, nelogičnog i štetnog poteza.

Smatramo da odlaganje i skladištenje radioaktivnog i nuklearnog otpada nastalog radom nuklearne elektrane Krško (Slovenija), na lokaciji Trgovske gore, nekoliko stotina metara od granice sa BiH, jednako toliko udaljeno i od područja odakle veliki broj građana BiH koristi vodu za piće, te manje od 3 km od središta opštine Novi Grad u Bosni i Hercegovini, ne ispunjava ni minimalne uslove, te da nije u skladu sa međunarodnim konvencijama, direktivama, sporazumima i standardima, a prije svega sa Konvencijom o nuklearnoj sigurnosti (Beč, 17. jun 1994.), Zajedničkom konvencijom o sigurnosti zbrinjavanja istrošenog goriva i zbrinjavanjem radioaktivnog otpada (Beč, 5. septembar 1997.), Konvencijom o procjeni utjecaja na okoliš preko državnih granica (Espoo, februar 1991.) sa Protokolom o strateškoj procjeni okoliša (Kijev 21. maj 2003.), Arhuškom konvencijom od 25. juna 1998. o pristupu informacijama, učešću javnosti u odlučivanju i pristup pravdi u okolišnim pitanjima i EU/EURATOM direktivi.

Zbog blizine granice sa Bosnom i Hercegovinom i njenog geografskog položaja predmetna lokacija imat će najveći negativni utjecaj na stanovništvo i životnu sredinu u Bosni i Hercegovini, na raznovrsni biljni i životinjski svijet, na rijeku Unu i vodozahvate vode za piće, ugrozit će Park prirode „Una“, Nacionalni park „Una“ i onemogućiti turizam i proizvodnju zdrave hrane u cijelom pogođenom području.

Posebno nas brine izostanak komunikacije institucija Republike Hrvatske sa institucijama Bosne i Hercegovine što nikako ne vodi dobrosusjedskim odnosima, te se nadamo da ce se

takav odnos pod hitno promjeniti budući da se radi od dvije susjedne države koje imaju međusobnu granicu dugu preko 1000 km.

Niko u Bosni i Hercegovini ne osporava pravo institucija Republike Hrvatske da ispune svoju obavezu i preuzmu 50% radioaktivnog i nuklearnog otpada nastalog radom nuklearne elektrane Krško i odlaže ga i skladišti u skladu sa konvencijama i direktivama, ali se snažno protivimo da to bude u našem dvorištu, bez ikakve komunikacije sa institucijama Bosne i Hercegovine i uz potpuno odsustvo brige za ljude i prirodna bogatstva koja se nalaze u Bosni i Hercegovini.

Zbog svega toga vas pozivam da se u ličnom kapacitetu, ali i sa velikom odgovornosti prema stanovnicima zemalja sadašnjih i budućih članica Evropske unije, uključite u rješavanje ovog velikog problema. Iskreno vjerujem da je ovo prilika da građani Bosne i Hercegovine kroz vaš angažman vide i benefite budućeg članstva u Evropskoj uniji, zajednici koja njeguje progresivne vrijednosti i jednaku brigu za sve građane Evrope.

Srdačan pozdrav,

Saša Magazinović, MP

Predsjednik Zelenog kluba
